



An Bhruiséil, 22 Feabhra 2019
(OR. en, it)

Comhad Idirinstitiúideach:
2017/0224(COD)

6551/19
ADD 2

CODEC 467
COMER 31
FDI 9
COMPET 152
IND 53

NÓTA MAIDIR LE MÍR "I/A"

ó:	Ardrúnaíocht na Comhairle
chuig:	Coiste na mBuanionadaithe/An Chomhairle
Ábhar:	Dréacht-RIALACHÁN Ó PHARLAIMINT NA hEORPA AGUS ÓN gCOMHAIRLE lena gcuirtear ar bun creat maidir le hinfheistíochtaí díreacha coigríche isteach san Aontas Eorpach a scagadh (an chéad léamh) - Glacadh an ghnímh reachtaigh - Ráiteas

Ráiteas ón Iodáil

Ar an 13 Meán Fómhair 2017, thíolaic an Coimisiún Eorpach an dréachtrialachán (COM (2017) 487 final - 2017/2204 (COD)). Rinne an Chomhairle agus an Pharlaimint an dréacht a leasú agus a fhorbairt agus pléadh ina dhiaidh sin é ag an gcrúinniú tríthaobhach, a tugadh chun críche ar an 20 Samhain 2018.

Tugann Rialtas reatha na hIodáile toradh na caibidlíochta dá aire, bunaithe ar théacsanna ar cuireadh bailchríoch orthu roimhe sin sular tháinig sé i mbun dualgas. Cé gur tháinig sé leis an gcuspóir bunaidh i dtús aimsire, is é sin le rá go ndéanfaí na Ballstáit agus an tAontas Eorpach a chosaint ar infheistíochtaí coigríche inchreice, tá sé beartaithe aige staonadh ó vótáil an lae inniu maidir leis an bpróiseas comhreachtóireachta agus is mian leis na pointí seo a leanas a chur i dtreis.

Is cúis imní é an togra le haghaidh Rialacháin, dar le Rialtas na hIodáile, a mhéid a bhaineann le roinnt na n-inniúlachtaí idir an tAontas Eorpach agus na Ballstáit agus meastar dó nach bhfuil dóthain forluí idir an togra agus na nósanna imeachta náisiúnta um scagadh, mar atá. Faoin reachtaíocht atá i bhfeidhm san Iodáil, tá cumhachtaí náisiúnta á bhfeidhmiú go docht cheana féin ag an Rialtas chun faireachán a dhéanamh ar infheistíochtaí coigríche agus oibríonn sé de mheon macánta chun 'infheistíocht chreiche' a chosc, ar infheistíocht í a dhéanfadh dochar do leasanna straitéiseacha na hIodáile agus an Aontais Eorpaigh i gcoitinne, nó a chuirfeadh na leasanna sin i mbaoil.

Leis an gcóras nua a thiocfaidh i bhfeidhm, an 'sásra rialaithe' mar a thugtar air, níl i gceist i ndáiríre ach malartú faisnéise nach dtugann ráthaíocht ar bith go mbeidh sé de chumas sna Ballstáit go léir éadálacha creiche a chosc.

Ina theannta sin, ó tharla go ndéantar foráil ann faisnéis faoi éadáil 'amhrasta' a scaipeadh, gan bearta cosanta éifeachtacha ná aonfhoirmeacha, tá an baol ann go meallfaidh sé ceannaitheoirí nua a gheobhadh amach go raibh cuideachta faoi réir tairiscint naimhdeach, ainneoin go bhfuil an malartú faisnéise faoi rún.

A luaithe a fhorhmear an Rialachán seo, tá an baol ann go measfar gur réitíodh an cheist faoi infheistíochtaí díreacha coigríche a scagadh agus go gcuirfear ar leataobh í sa Bhruiséil ar feadh i bhfad: d'fhágfadh sin go mbeadh an-chontúirt ann i gcónaí, i ngeall ar infheistíochtaí creiche, do na Ballstáit sin nach bhfuil sásra náisiúnta um scagadh ('sárchumhacht') acu. Ba cheart, ina ionad sin, tús áite a thabhairt d'ionstraim rialála a chothódh aonfhoirmeacht idir na Ballstáit a mhéid a bhaineann le faireachán a dhéanamh ar infheistíochtaí díreacha coigríche atá dírithe ar shócmhainní straitéiseacha, trí shásraí náisiúnta um scagadh a chruthú agus trí íoschaighdeáin a shocrú nuair is gá.

Forchoimeádann Rialtas na hIodáile an ceart tionscnamh ar bith amach anseo a bheadh úsáideach a chur chun cinn, ar tionscnamh é a chuirfeadh i gcoinne cleachtas míchothrom, ar bhealach leordhóthanach, agus a chosnódh an tAontas Eorpach ó éadálacha creiche a dhéanfadh tríú tíortha.

Lena chois sin, déanfaidh an Rialtas, i gcomhar le Parlaimint na hIodáile, faireachán tráthúil seasta ar chur chun feidhme an Rialacháin, a luaithe a thiocfaidh sé i bhfeidhm, agus iarrann sé ar an gCoimisiún déanamh amhlaidh.